

Yeshua, Esun Ungi di Israel i Juda; Su Kompashon!!!

Felipe a haña Natanael i a bis'é: "Nos a haña Esun di Kende Moisés a skirbi den e Lei i di Kende e Profetanan tambe a skirbi Yeshua di Nazarèt, yu di Jose." (Juan 1:45).

Yeshua: e Lei, e Enseñansa di Dios Tata!!!.

'No odia bo ruman den bo kurason; Reprendé bo Próhimo, ma no kai den piká pa su motibu. 'No tuma vengansa, ni tene renkor kontra e yunan di bo pueblo, ma Stima bo Próhimo manera bo mes; Ami ta SEÑOR. (Levítico 19:17-18).

'Ora ku un stranhero ta biba serka boso den boso tera, no trat'é malu. E stranhero ku ta biba serka boso mester ta pa boso manera un yu di tera meimei di boso; stim'é manera bo mes, pasobra boso tabata stranhero na tera di Egipto: Ami ta SEÑOR boso Dios. (Levítico 19:33-34)

I mira, un eksperto di Lei a lanta para i a pon'E na prueba, bisando: "Maestro, kiko mi mester hasi pa eredá Bida Eterno?" I Yeshua a bis'é: "Kiko ta pará skirbí den Lei? Kiko bo ta lesa den djé?" I el a kontestá i a bisa: "Stima SEÑOR bo Dios ku henter bo Kurason, i ku henter bo Alma, i ku tur bo Forsa, i ku henter bo Mente; i bo Próhimo manera bo mes." I Yeshua a bis'é: "Bo a kontestá bon; hasi esaki i lo bo Biba." Ma e kier a hustifiká su mes i a bisa Yeshua: "I ta ken ta mi Próhimo?" (Lukas 10:25-29).

Yeshua; ta Dios Tata Su Kompashon!!!.

Awor ta ken ta abo su Próhimo? Den e Lei; e Enseñansa di Dios tin 613 Mandamentunan skirbi pa abo Obedesé. Tur e 613 Mandamentunan aki ta bai over di e relashon entre abo i bo Próhimo; manera no odia bo ruman den bo kurason, no tuma vengansa kontra bo ruman, no tene renkor kontra bo ruman, no trata bo ruman malu.

Awor aki den 2020 ta kon abo por Stima bo Próhimo manera bo mes, siendo abo su Próhimo ta un otro hende? Fisikamente nos ta diferente, pero Spiritual nos ta den Union ku Dios. Abo su Alma ta loke abo ta Bèrdaderamente, asina tambe bo Próhimo su Alma ta den Union ku Dios.

Ora un Alma bini na mundu Dios Tata ta duna Su Spiritu Santu (Genesis 2:7). Despues di máximo 120 aña un Alma ta bandoná e mundu aki, anto Dios Su Spiritu Santu ta bai bek serka Dios Tata (Eklesiastés 12:7).

Awor aki den 2020, Yeshua ta muestra i dirigí abo na Dios Su Kompashon, pasombra e Lei, e Enseñansa di tur e 613 Mandamentunan aki ta den Union ku Dios Tata. Stima Dios kiermen Stima Su 613 Mandamentunan, anto un hende ku Stima Dios mester hiba su Próhimo serka Dios dor di siña su Próhimo kon Biba den Union ku Dios i Su 613 Mandamentunan.

8 novèmber 2020

Sea Bendishoná ku e Amor di Dios Tata; Yeshua Mesias
Un Fiel Sirbidó di Dios,
Remsly L Riley.